

Memorandwm Esboniadol ynghylch Gorchymyn Iechyd Planhigion (Phytophthora Ramorum) (Cymru) (Diwygio) 2007

Paratowyd y Memorandwm Esboniadol hwn gan yr Adran Materion Gwledig ac fe'i cyflwynir gerbron Cynulliad Cenedlaethol Cymru.

1. Disgrifiad

Mae'r Gorchymyn hwn yn diwygio Gorchymyn Iechyd Planhigion (Phytophthora Ramorum) (Cymru) 2006 ("y prif Orchymyn"), sy'n cynnwys mesurau i atal Phytophthora ramorum rhag cael ei gyflwyno a'i ledaenu. Mae'n gweithredu Penderfyniad y Comisiwn 2007/201/EC ac yn cywiro mân wallau trosi yn y prif Orchymyn.

2. Materion o ddiddordeb arbennig i'r Pwyllgor Is-ddeddfwriaeth

Nid oedd unrhyw faterion o'r fath yn codi. Mae'r Gorchymyn hwn yn gweithredu rhwymedigaethau cyfarwyddol y Gymuned drwy Benderfyniad y Comisiwn 2007/201/EC, sy'n diwygio Penderfyniad y Comisiwn 2002/757/EC.

3. Y Cefndir Deddfwriaethol

Mae Penderfyniad y Comisiwn 2007/201/EC yn diwygio Penderfyniad y Comisiwn 2002/757/EC, sy'n nodi mesurau i'w cymryd mewn Aelod-wladwriaethau yn erbyn Phytophthora ramorum er mwyn dod o hyd i'r organedd, penderfynu ar ei ddsbarthiad a'i atal rhag digwydd a lledaenu. Gweithredir y Penderfyniad hwn yng Nghymru ar gyfer planhigion a deunydd plannu gan Orchymyn Iechyd Planhigion (Phytophthora ramorum) (Cymru) 2006, gan ddefnyddio pwerau o dan Ddeddf Iechyd Planhigion 1967. Mae deddfwriaeth gyfatebol, ar wahân ar waith yn Lloegr, yr Alban a Gogledd Iwerddon.

Mae Gorchymyn Iechyd Planhigion (Phytophthora ramorum) (Cymru) 2007 yn cael ei wneud o dan adrannau 2 a 3(1), (2), (3) a (4) o Ddeddf Iechyd Planhigion 1967. Cafodd y swyddogaethau a roddwyd gynt i Ysgrifennydd Gwladol Cymru eu trosglwyddo i Gynulliad Cenedlaethol Cymru ac maent bellach wedi eu breinio yng Ngweinidogion Cymru yn rhinwedd adran 162 a pharagraff 30 o Atodlen 11 i Ddeddf Llywodraeth Cymru 2006.

Mae'r offeryn hwn yn cael ei wneud gan ddefnyddio'r weithdrefn penderfyniad negyddol.

4. Diben y ddeddfwriaeth a'r effaith y bwriedir iddi ei chael

Mae Gorchymyn Iechyd Planhigion (Phytophthora ramorum) (Cymru) 2007 yn diwygio Gorchymyn Iechyd Planhigion (Phytophthora ramorum) (Cymru) 2006 ("y prif Orchymyn"). Mae'n gweithredu

Penderfyniad y Comisiwn 2007/201/EC ac yn cywiro mân wallau trosi yn y prif Orchymyn. Mae'r prif newidiadau fel a ganlyn:-

- diwygiad i'r rhestr o ddeunydd sy'n dueddol o gael y pla y mae'r Gorchymyn yn gymwys iddi, a
- chyflwyno gofynion ychwanegol ar gyfer symud deunydd sy'n dueddol o gael y pla, yn benodol bod mesurau ffytoiechydol yn cael eu cymryd o fewn radiws o ddau fetr i le y mae planhigion heintiedig wedi bod.

Mae'n ofynnol i Lywodraeth y Cynulliad weithredu'r Penderfyniad hwn gan y Comisiwn cyn gynted ac y bo'n ymarferol bosibl er mwyn sicrhau dull cyson o weithredu ledled yr UE er mwyn atal y pathogen planhigion hwn rhag cael ei gyflwyno a'i ledaenu. Cyngor yr Arolygiaeth Iechyd Planhigion a Hadau, sy'n gweithredu yng Nghymru ar ran Llywodraeth y Cynulliad, yw y byddai peidio â gweithredu'r diwygiadau hyn yn golygu y byddai mwy o fygythiad i iechyd planhigion yng Nghymru.

5. **Gweithredu**

Bwriedir i'r Gorchymyn Diwygio hwn ddod i rym ar 12 Hydref 2007. Gweithredwyd deddfwriaeth gyfatebol yn Lloegr ar 15 Awst 2007 ac mae'n cael ei hystyried yn yr Alban a Gogledd Iwerddon ar hyn o bryd. Ni ddisgwylir y byddai gweithredu'r Rheoliadau hyn yn cael unrhyw effeithiau arwyddocaol yng Nghymru ac eithrio cyflwyno mesurau gwell i reoli afiechydon. Er hynny, byddai methu â gweithredu'r diwygiadau hyn yn arwain at anawsterau gweithredol i'r Arolygiaeth Iechyd Planhigion a Hadau, oherwydd byddai angen iddi ddefnyddio cyfundrefnau rheoleiddio gwahanol yng Nghymru a Lloegr wrth ddarparu gwasanaethau sy'n gysylltiedig â'r Gorchymyn hwn.

6. **Ymgynghori**

Ni farnwyd bod angen ymgynghori'n gyhoeddus ynghylch y Gorchymyn Diwygio. Mae'r diwygiadau'n gweithredu rhwymedigaethau cyfarwyddol arferol y Gymuned, nad ydynt yn rhai dadleuol. At hynny, cafodd cynrychiolwyr y diwydiant yn y DU gyfle i ymateb i ymgynghoriad a gynhaliwyd ar lefel yr UE ymhlith rhanddeiliaid cyn i'r deddfwriaeth gael ei llunio. O ganlyniad, ni chynhaliodd Lloegr na'r Alban ymgynghoriad penodol ynghylch y mater hwn a barnwyd y byddai'n briodol gweithredu yn yr un modd yng Nghymru.

7. **Asesiad Effaith Rheoleiddiol**

Ni pharatowyd asesiad effaith rheoleiddiol, gan nad yw'r Gorchymyn Diwygio yn effeithio o gwbl ar gostau busnesau, awdurdodau lleol na'r sector gwirfoddol.